



**Äntwert vum Minister fir Energie, Claude Turmes, op d'parlamentaresch Fro n°7133 vum 8.
November 2022 vum éierewäerten Deputéierten Sven Clement iwwert
d'Zukunft vum Gas zu Lëtzebuerg**

1. Plangt d'Regierung en kompletten Ausstieg vu Lëtzebuerg aus dem Gas? Wa jo, zënter wéini lafen dës Pläng genau a wéi sollen dës ëmgesat ginn? Wa nee, firwat net a soll sech do eppes a noer Zukunft änneren?

Dat am aktuellen "Plan national intégré en matière d'énergie et de climat" (PNEC) formuléiert Zil ass d'Klimaneutralitéit spëttestens bis 2050. Fir déi Klimaneutralitéit ze erreechen, ass et noutwenneg, dass op de Gebrauch vun alle fossillen Energiequellen muss verzicht ginn, och op de Gas.

Den Ausstig aus de fossillen Energiequellen, woubäi sech hei op d'Beheize vu Gebaier beschränkt gëtt, gëtt iwwer verschidden, deelweis komplementar Mesuren ënnerstëtzt. Do geet et engersäits drëm, déi bestoend Gebaier ze dekarboniséieren an anerersäits nei Gebaier vu vireran esou ze bauen, dass keng fossil Energie méi agesat gëtt.

Fir de Bestand ze dekarboniséieren ginn et folgend Hëllefprogrammer (déi kumulabel sinn):

- Klimabonus (fréier PRIME House) Hëllef vum Staat fir den Austausch vun enger bestoender Heizungsanlag déi op fossiller Energie baséiert (betrëfft ënner anerem Gasheizungen a Masuttsheizungen) duerch eng Wärmepompe, eng Holzheizung (Pellets) oder den Uschloss un ee Wärmenetz;
- Hëllef vun de Stroum- a Gasliwweranten am Kader vum Energieeffizienz Obligationsmechanismus (EEOS);
- Hëllef vu verschiddene Gemengen (déi oft op de Klimabonus Hëllef baséieren);
- Hëllef vu privaten Acteuren.

D'Detailer zu deene verschiddenen Hëllef fënnt een am Aiden-Simulator vun der Klima-Agence (<https://aides.klima-agence.lu/>).

Fir dass nei Gebaier an Zukunft just nach mat fossilfräien Heizungsanlagen gebaut ginn, ass mam Reglement vum 9. Juni 2021 zur Energieeffizienz vun de Gebaier eng Upassung vun der Referenztechnologie fir d'Heizungsanlagen agefouert ginn, dat heescht statt enger Gasheizung gëtt ab dem 1. Januar 2023 d'Referenz mat enger Loft-/Waasser-Wärmepompe berechent, wat bedeit, dass nei Gebaier fir déi eng Baugeneemegung ab dem 1. Januar 2023 ugefrot gëtt, d'Virgaben praktesch just nach erreechen, wann se mat enger Wärmepompe realiséiert ginn. Dëse Schrëtt ass schonn Enn 2018 dem Secteur fir d'éischt ugekënnegt ginn an ass mam Reglement vun 2021 och reglementaresch festgehalten.

An deem Sënn ass et och net méi virgesinn, dass nach ee gréisseren Ausbau vun de Gasnetzer gemaach gëtt.

2. Ginn aktuell nach Aarbechte fir den Ausbau vum Gasreseau virgeholl?

Et ginn zu Lëtzebuerg véier Acteuren am Beräich vun de Gasreseauen: den Transportnetzbedreier – Creos – deen de Gasreseau um Niveau vum Transport, dat heescht am Héichdruck, bedreift; dräi Distributiounsnetzbedreier – Creos, Sudenergie, Ville de Dudelange – déi de Gas op der Distributiounsebene, dat heescht um Mëttel- an Nidderdruck, bedreien. All Haiser, déi un engem Gasreseau ugeschloss sinn, sinn dat um Niveau vum Distributiounsreseau.

All Gasnetzbedreier ass a bleift zoustänneg fir d'Versuergungssécherheet a sengem Reseau an och fir d'Sécherheet vun deem Reseau. An deem Kader maachen allegueren d'Gasnetzbedreier reegelméisseg Entretien- a Maintenancearbechte vun hirem Reseau, wou och deelweis Stécker vu Leitungen ersat musse ginn.

Um Niveau vum Transportreseau ass den Ausbau vum Gasnetz schonns viru Joren ofgeschloss ginn, sou dass hei just nach Entretien- an Maintenancearbeiten ufalen.

Bei den Distributiounsreseauen ass d'Situatioun méi differenziert, mä geet an déi selwecht Richtung.

Am Distributiounsreseau vun der Creos ginn et nach Ausbauarbeiten, déi an noer Zukunft awer staark reduzéiert ginn. Nieft der Stad Lëtzebuerg verdeelt Creos Gas an 42 Gemengen. D'Reseauen an deenen 42 Gemengen sinn ab 1990 lues a lues opgebaut ginn a sinn nach net an alle Gemengen ofgeschloss. An den Iwwerleeungen zum Klimaneutralitéitszil vun 2050 huet Creos mat den 42 Gemengen een individuell Zilnetz opgestallt, dat den Ausbau just nach do virgesäit wou et zesummen, aus verschiddensten Iwwerleeungen eraus, als onvermeidbar ugesi ginn ass fir déi Aarbechten nach ofzeschléissen. Dësen Ausbau ass am Prinzip bis Enn 2023 ofgeschloss a kann nëmmen ënner besonnesche Bedingungen bis maximal 2026 virugefouert ginn. Vill vun deene Gemenge sinn awer och haut schonn an hirem Zilnetz ukomm. Bei deenen anere Gemenge sinn dat och just deelweis kleng Stécker vu Leitungen, déi nach gebraucht ginn fir dass d'Clienten och hire bestallten Uschloss kënne kréien.

Den Distributiounsreseau vu Sudenergie bedéngt Clienten a 15 Gemengen am Süde vum Land. D'Sudenergie huet keng Pläng méi säin Distributiounsreseau op nei Zonen auszewäiten. Deemo sinn och keng Extensiounsarbechte méi am Gang, ausser dass punktuell eventuell aus techneschen Ursachen Stécker vum Reseau misste verstärkt ginn.

Den Distributiounsreseau vun der Stad Diddeleng bedéngt exklusiv den Territoire vun där Gemeng. Hei gëtt et kee weideren Ausbau méi.

3. Ginn Gebaier "en attente", déi also scho méi laang un de Gasreseau sollten ugeschloss ginn, aktuell nach un dësen ugeschloss?

Gebaier déi "en Attente" sinn, déi also scho méi laang un de Gasreseau sollten ugeschloss ginn, kënnen aktuell och nach ëmmer ugeschloss ginn.

Allerdéngs, wéi schonns an der Äntwert op déi 1. Fro geschriwwen, gesäit d'Reglement vum 9. Juni 2021 zur Energieeffizienz vun de Gebaier d'Wärmepompe beim Neibau als Referenztechnologie vir.

Och bei Renovéierungsarbeiten vun Haiser a Gebaier läit et natierlech op der Hand, dass d'Hëtze vun deene Gebaier sollt op Basis vun erneierbaren Energië gemaach ginn.

4. Wann d'Äntwert op Fro 3 jo ass, kënnen d'Leit nach aus dëse Kontrakter erausklammen an hir Sue rembourséiert kréien?

Et steet de Leit fräi ze decidéieren, ob si gegebenefalls wëllen ee Gasuschloss benotzen, dat heescht et gëtt do keen Zwang derzou. Och Leit, déi net méi hire Gasuschloss wëllen notzen, well se beispillsweis hir Heizungsanalg op eng erneierbar Quell wëllen ëmstellen, kënnen hiren Uschlossvertrag mam Distributiounsnetzbedreiwer opléisen.

Wann de Réckbau vum Netzuschloss gewënscht ass, dann ass deen zu laaschte vum Client.

5. Ass eng Aide fir Leit geplangt, déi réischt rezent, zum Beispill an de leschten 10 Joer, op eng Gasheizung ëmgestallt hunn, fir op zum Beispill eng Wärmepompe ëmzestellen?

Wéi an der Äntwert zur Fro 1. beschriwwen, gëtt den Austausch vu bestoende Gasheizung mat verschiddene ganz attraktiven Hëllef gefördert. Bei der staatlecher Hëllef Klimabonus ass et esou, dass een den zousätzleche Bonus beim Ersatz vun enger Gasheizung nëmmen da kritt, wann déi bestoend Heizung op manst 10 Joer al ass.

Lëtzebuerg, den 8. Dezember 2022

(s.) Claude Turmes
Minister fir Energie